

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. उपराज्यपाल मनोज सिन्हा होरें आखेआ ऐ जे पहलगाम आतंकी हमले दी साजश रचने आलें दी पंछान करियै एनआईए एह जकीनी बनाग ते उनेंगी बी उससै चाल्ली बनकदी सजा थोए जियां होरने आतंकी कमांडरें दा अंजाम होआ ऐ।
2. मुख्यमंत्री उमर अब्दुल्ला होरें आईआईटी जम्मू दे “समर स्कूल” कार्यक्रम दे समापन समारोह च हिस्सा लैता।
3. खराब मौसम दे चलदे अमरनाथे दी यात्रा फिलहाल दौनें रस्तेयां बंद ऐ, जम्मू थमां बी अज्ज कोई जत्था घाटी लेई नेई भेजेआ गोआ।
4. मुख्य सचिव अटल डुल्लू होरें आखेआ ऐ जे हुनी ते समर्था च कन्नोकन्नी बाद्धा करदे रौहना गै कामयाबी दी कुंजी ऐ।
5. पुलस महानिदेशक नलिन प्रभात होरें अखनूर सब-डिवीजन दे बन्ने आले इलाके दा दौरा लाइयै सुरक्षा प्रबंधें दा जायजा लैता।

<><><><><><>

LG-Seminar

उपराज्यपाल मनोल सिन्हा होरें आखेआ जे पहलगाम आतंकी हमले दे पिच्छे जेहड़े बी लोक हैन उंदी पंछान करियै एनआईए दी जांव इस गल्ला गी जकीनी बनाग जे इंदा बी उयै हाल होए जेहड़ा आतंकवादी दे सिरे दे कमांडरें दा होंदा ऐ। आतंकवाद पाकिस्तान दे डीएनए च ऐ, एह गल्ल उनें नमीं दिल्ली च गांधी स्मृति आस्सेआ आयोजित इक सैमीनार जेएंडकेमार्च टूवर्डस पीस च आक्खी। इस मौके पर उपराज्यपाल होरें नमीं विकसित गांधी स्मृति आर्ट गैलरी दा उद्घाटन कीता।

<><><><><><>

CM-IIT

मुख्यमंत्री उमर अब्दुल्ला होरें कल आईआईटी जम्मू च आयोजित “समर स्कूल 2025” दे समापन समारोह च हिस्सा लैता। जेहदे कन्नै गै म्हीना भर चले दा एह विशेष कार्यक्रम कामयाबी कन्नै सम्पन्न होइ गेआ जेहदे च मुख्ये दे बक्ख-बक्ख हिस्सें थमां 1 जहार कोला मते विद्यार्थिएं शिरकत कीती। इस समारोह गी संबोधत करदे होई मुख्यमंत्री होरें आईआईटी जम्मू दी सराहना कीती जेहड़ा छमता ते प्रतिभा दे इक प्रमुख केन्द्र दे रूपै च कम्म करै करदा ऐ ते इस चाल्ली दे आयोजन राएं नोजवानें गी ज्ञान ते समर्था कन्नै लैस करै करदा ऐ। उनें आखेआ जे इस चाल्ली दे कार्यक्रम दी मदद कन्ने विद्यार्थिएं दी सोच, जानकारी, समझ ते जागरूकता दा दायरा बधदा ऐ ते होरने विद्यार्थिएं कन्नै बचारे दा आदान प्रदान दी उंदे विकास लेई मता लाहकारी साबत होंदा ऐ। मुख्यमंत्री होरें आखेआ जे जम्मू कश्मीर सरकार बक्ख-बक्ख क्षेत्रें ते मंचें पर आईआईटी जम्मू दा सैहयोग बधानें पर कम्म करै करदी ऐ जिंदे च जल संरक्षण, जलवायु परिवर्तन, उद्योगिक विकास ते बपार कारोबार शुरू करने लेई मुंडली ते सिखलाई ते होर केई क्षेत्र बी शामिल न।

<><><><><><>

CM Status

मुख्यमंत्री उमर अब्दुल्ला होरें कल जम्मू दे गांधी नगर आले जागतें दे सरकारी हायर सकेंडरी स्कूल च साबका प्रिंसिपल सुर्गवासी कुलदीप कुमार बड़ेयाल हुंदी मूर्ति परा पड़दा गोहाड़ेया। इस मौके अपनी ड्यूटी अंजाम दिंदे होई शहीद होए दे इस शिक्षक गी श्रद्धांजलि भेंट कीती गई। कार्यक्रम च केई वरिष्ठ सरकारी अफसर, विधायक, टीचर, विद्यार्थी ते आम लोक बी मजूद हे। इस मौके मुख्यमंत्री होरें शहीद प्रिंसिपल दे बलिदान गी चेता करदे होई आखेआ जे इक अध्यापक दे रूपै च विद्यार्थिएं दे जीवन गी ज्ञान दी लोह कन्नै रोशन करने आले कुलदीप कुमार बड़ेयाल होरें गी सदा सदा लेई चेता रखेआ जाग। उनें घोषणा कीती जे स्कूल दा नां बी उंदे नांह पर रखेआ जाग।

<><><><><><>

Amarnath Yatra

कश्मीर ते जम्मू खित्ते दे मते सारे हिस्सें च खराब मौसम दे चलदे श्री अमरनाथ जी दी यात्रा आरजी तौर पर रोक दीत्ती गई ऐ। बालटाल ते पहलगाम आले रस्ते पर भारी बरखा दे चलदे यात्रा गी अज्ज लेई स्थगित कीता गेआ ऐ। जम्मू दे भगवती नगर आले आधार शिविर थमां इक अधिकारी नै आकाशवाणी समाचार श्रीनगर गी जानकारी दित्ती ऐ जे अज्ज जम्मू थमां घाटी लेई यात्रा गी रवाना होने दी इजाजत नेई दित्ती गई। उआं कल संजा तगर तकरीबन 2 लक्ख 50 ल्हार श्रद्धालुएं पवित्र गुफा च मत्था टेकेआ ते शिवें दे हिमलिंग रूपै दे दर्शन कीते।

<><><><><><>

Legislator Rana

विधायक मुबारक गुल, पवन कुमार गुप्ता ते प्यारे लाल शर्मा होरें जल शक्ति ते जनजातीय मामले दे मंत्री जावदे अहमद राणा हुंदे कन्नै मलाटी कीती। इस दरान उनें लोकें दी भलाई बेह्तरी, जंगलें दी हिफाजत, जनजातीय सरबंधी मामलें ते पीएचई मैह्कमे कन्नै जुड़े दे केई मामलें पर चर्चा कीती। गल्लबात दरान विधायकेंअपने अपने विधानसभा क्षेत्र दे मामले उंदे अगगे रखे। राणा होरें उंदी चिंताएं गी ध्यानै नै सुनेआ ते मुत्तलकस अधिकारिएं गी इंदे तौले नबेड़े लेई हिदायम दित्तियां।

<><><><><><>

CS

जम्मू कश्मीर च हुनर विकास सरबंधी तंत्र च बदलाव करने दे मकसद कन्नै श्रीनगर दे शोर-ए-कश्मीर इंटरनेशनल कांफ्रेंस सेंटर च 2 रोला कांफ्रेंस दा सरिस्ता कीता गेआ। कांफ्रेंस च इस दरान मंत्री दे आधार पर हुनर दी सिख्सलसई देने आले कार्यक्रम, गल्लबात आले सत्र दा सरिस्ता कीता गेआ ऐ। प्रतिभागिएं गी भविक्ख दी मंग दे स्थाबैहुनर विकसित करने उद्योगें मूजब सिखलाई बारे दस्सेआ जा'रदा ऐ। मुख्य संबोधन च मुख्य सचिव अटल डुल्लू होरें उद्योगें स्थाबै पैदा होने आली जरूरतें हुनर विकास आले सरिस्ते गी बेहतर करने पर जोर पाया। उनें उद्योग ते शिक्षा इदारे दी सांझ भ्याली पर जोर दित्ता। उनें आखेआ जे समर्थ च कन्नो कन्नी बाद्धा करदे रौहना गै कामयाबी दी कुंजी ऐ।

<><><><><><>

DGP Border Area

पुलस महानिदेशक नलिन प्रभात होरें कब्जा रेखा कन्ने लगदे इलाकें दा दौरा लाया ते औंदी बुड्डा अमरनाथ यात्रा ते चला'रदी श्री अमरनाथ यात्रा ते औंदे स्वतंत्रता दिवस दे सिलसिले च सुरक्षा इंतजामें दा जायजा लैता। आईजीपी जम्मू जोन भीम सेन टूटी, आईजीपी सीबआरपीएफ जम्मू जी.के.राओ ते होर दुए वरिष्ठ अधिकारी बी उंदे कन्नै गेदे हे। अपने दौरे दरान उनें अगेत्री चौकी बूचा मंडी दा दौरा लाया ते उत्थें तैनात जवानें ते उत्थुआं दे कमांडिंग अफसर कन्नै गल्ल कीतीं उनें जमीनी हालात च जायजा लैता ते मती तालमेल बनाइयै कम्म करने ते यात्रा ते राष्ट्रीय पर्व गी रमानदारी आले ढंगै सिर करोआना जकीनी बनाने लेई आखेआ।

<><><><><><>

Div.Com-Shiv Khori

जम्मू दे डिवीजनल कमीशनर ते शिवखोड़ी श्राईन बोर्ड दे चेयरमैन रमेश कुमार होरें पवित्र रंसू कस्बे दा दौरा लाया ते चला'रदे श्रावन महोत्सव लेई कीते गेदे इंतजामें ते पवित्र गुफा दे आले दोआले चला'रदे विकास कम्में दी प्रगति दा जायजा लैतां इस दौरे दा मुख्य मकसद इस गल्ला गी जकीनी बनाना हा जे इस सालाना महोत्सव लेई लोड़चदे सारे इंतजाम कीते गेदे न। जायजा बैठक दी अध्यक्षता करदे होई डिवीजनल कमीशनर होरें बेहतर शिड़क राबते, साफ सफाई ते होर दुई सेवाएं पर जोर पाया।

<><><><><><>

School Reopen

सेहे दिएं छुट्टियें दे बाद समूलचे जम्मू प्रांते च स्कूल अज्जै थमां खुल्ली गे न ते स्कूलें च बच्चें दे औने कन्नै रौनक इक बारी परतियै परतोई आई ऐ। अज्ज बडलै स्कूलें च बच्चें अपनी टीचर ते दोस्तें मितरें कन्ने मिले। बच्चें दा स्कूलें च निग्गा सुआगत कीता गेआ, असेंबली च विशेष प्रार्थना होइयै केइएं बच्चें छुट्टियां दा अपना तर्जुबा सांझा कीता। स्कूल खुल्लने कोला त्रै चार दिन पैहले गै टीचरें तेहोर दे स्टाफ नै स्कूल पूरी चाल्ली रमानदारी ते बवस्था आले ढंगै नै चलाने लेई लोड़चदे प्रबंध करी लैते हे ते अज्जै थमां कलासां पूरी शिददत कन्नै शुरू होई गेइयां न ते बच्चे मते उत्साह कन्नै टैमै सिर स्कूल पुज्जी गे हे.

<><><><><><>

The Study Buddy

जम्मू कश्मीर स्कूली शिक्षा विभाग आस्सेआ विकसित कीता गेदा चैटबाक्स "जेके स्टडी बडी" विद्यार्थिएं दी पढ़ाई च मता कारी दा साबत होआ करदा ऐ। रामबन जिले च बी मैहकमे आस्सेआ इस ऐप दा इस्तेमाल कीता जा'रदा ऐ ते बच्चे एहदा पूरा फायदा ठोआ करदे न। एह चैटबाक्स "विद्या समीक्षा केन्द्र" नां दी इक बड्डी पैहल दा हिस्सा ऐ जेहदे राएं डेटा ते तकनीकें दा इस्तेमाल करियै स्कूले च महत्वपूर्ण फैसले लैने च सुधार आंदा जा करदा ऐ। चैटबाक्स दी मदद कन्नै स्कूलें च पढ़ाई ते पढ़ाने दी कारकरदगी च सुधारआपै करदा ऐ ते बच्चे बी बेहतर ढंगै नै सखाए जाने आली हर चीज पूरी बरीकी कन्नै समझे करदे न। एहदे नै बच्चें दी समें सिर हाजरी गी लग्गे करदी ऐ जेहदे नै स्कूलें च बच्चें दी मजूदगी बी बधै करदी ऐ। स्कूलें दे कम्में पर तक्क बी रखी जा करदी ऐ ते शैक्षणिक ते ढांचागत सुधारें पर बी विशेष ध्यान दित्ता जा'रदा ऐ। इस बारे आकाशवाणी कन्नै गल्ल करदे होई डाइट रामबन दे जिला सतह दे मास्टर ट्रेनर शाहनवाज गनी.

<><><><><><>